



Die Gsalzene

Dr BVB-Diräggtter hett me gchasst und das beriert uns seer
Drbyy hett äär en doch nur wertligg gnoo – dr effentlig Verkeer
Und drzue dien sini Blüddlibilder voll ins Schwarze braiche
Denn wo zwai Schiine zämmekemme – said dr Drämmler – hetts e Waiche

Mitgliederinne vo Frauinnegrubbe duets vor Fraid fascht schelle
Nid nur Emanzinne - au Männerinne - hänn die Quote welle
Die Euphorie isch guet und rächt, doch uns duet diefi Bsornis quääle
Will niechtern gsee jetz all die Fraue hintrem Härd dien fääle!

Bi Basel – Schalke ggesch wie d' Greenpeace Lytt e Helge dien entfalte
Wäärend d' Fans sich närve fibbe im Tertianum alli Alte
Voll Fraid said s' Zaanloos-Röösli denn zem Rumpfelhuffe-Megge:
„Mit däre Technigg kenntscht Di Brunggstigg uff zwai Santimeeter stregge!“

D' Baaragraaferytter nämme uns mit neie Gsetzli draa
Wär am Verkeer dailnimmt muess au am haitre Daag si Liecht a haa
Bi de Zyrcher macht me drum mit Buessegälder satti Gwinn
Will die bekanntlig permanänt unterbeliechtet sinn

Die Herre Sarkozy und Hollande sinn zwai giggerigi Zwärge
Ires Frauebild isch bräägd vo diefe Dääler, hoche Bäрге
Si wandere vo Rogg zue Rogg und dien sich verlustiere
Mit Bluetarmuet im Himi loot sich's ebbe schlächt regiere
Mit däm Brofyy, do hätte si – und das ganz ooni Häxerei
Karierechance bi dr Zyrcher Sittepolizei

Bis jetzt hänn d' Brite in Ägypte Gold und Mumie gstoole
Chelsea goot jetzt neii Wääg und duet d' Ägypter läbig hoole
Als ainzig' Änderig fir näggschti Saison – mir dien's konstatiere
Wird dr FC Chelsea mit em Salah gege uns vriere

D' Oprah Winfrey wird sit Moonede scho gruppetherabiert
E Verkaifferin in Zyyri hett se yskalt abserviert
Dä sogenannt Skandal duet mänge Ehemaa uskoschte
Will's doch no Lääde gitt wo nid so aifach Handdäsche kasch boschte

....und dr Monschervärs

Spitzel, Schniffler, Intrigante
Himmeldruurigi Vagante
D' Amis die sin jetze gwasi
Die wiirdig Noochfolg vo dr Stasi

Dr Bush hett uns arg strapaziert
Mit sinre Dummhait malträtiert
Doch no mee als das gaistig Lama
Närvt jetz dr gueti Herr Obama

Dr Barack maint zue dr Michelle:
„Kumm ins Bett mit dim Faargstell
I see grad do bim Berlusconi
Stellige, die kenni noni!“

Sini Agänte seen und loose:
D' Frau Merkel in de Underhoose
Pro Maa bruuchts drumm – das isch nid glooge
E Care-Team vo 2 Psychologe

Dr Ghaimdienstchef said zem Obama:
„Los, Barack, es isch e Drama
Mir heere gar nyt me us Poole
Die hänn dert alli Wanze gstoole!“

Und am Christopher Street Day
Heersch em Topagänt si Gschrei:
„D' Kameronen dien 's nid ushalte
Sofort s' Weermebild abschalte!“

In Griecheland und in Italie
Isch s' Iberwache kai Lapalie
Beweegigsmälder, s'isch e Hoon
Sinn dert e Fäälinveschtizoon!“

Noch Duusige vo Abheerstunde
Rieft ain: „I ha e Ghaimins gfunde
Kai Schwyzer gitt's freiwillig bryys
S' Rezäpt vom Abbezäller Chees!“

Sii gseen: Au d' Schwyz isch infiltriert
Drum wird per Nooträcht jetz diktiert:
„Zem das stoppe muess e jeede
Ab sofort Walliserdytsch reede!“

Die Situation kennt eskaliere
Wie sotti d' Schwyz druff reagiere?
S' gitt nur ai Wäg us däre Noot
Die Gsalzene in Bundesroot!